



PATNUBAY SA MISA



20 Abril 2019

MAGDAMAGANG PAGDIRIWANG SA PASKO NG MULING PAGKABUHAY

Taon K

ANG PAGTAWID MULA SA KALUNGKUTAN PATUNGO SA KALIGAYAHAN

Ayon kay San Agustin, ang tatlong pinakamahalagang araw sa taon ay ang Biyernes Santo, ang Sabado Santo, at ang Linggo ng Muling Pagkabuhay. Sa Biyernes Santo ay ipinagdiriwang ang Pagpapakasakit at Pagkamatay ng Panginoon. Nagsisimula ito sa gabi ng Huwebes Santo kung saan sa pagtatatag ng Banal na Eukaristiya ay ibinigay sa atin ang tanda ng pagpapakasakit at pagkamatay ni Hesus. Sa hapon ng Biyernes Santo naman ay

ipinagdiriwang ang katunayan ng pagpapakasakit at pagkamatay ng Manunubos. Sa Sabado Santo naman ay pinararangalan ang pagkalibing ng Panginoon.

Sa Linggo ng Muling Pagkabuhay ay ipinagdiriwang ang maluwalhating pagbangon ng Panginoon mula sa libingan. Ito ay nagsisimula sa gabi ng Sabado Santo sa Magdamagang Pagdiriwang. Ito ang pinakabanal na gabi sa buong taon. Ito ang tulay na tinatawid mula sa kalungkutan ng kamatayan tungo sa kaligayahan ng Muling Pagkabuhay.

UNANG YUGTO

ANG PAGPAPARANGAL SA ILAW



Lahat ng mga ilaw sa simbahan ay hindi muna sisindihan. Isang malaking siga ang ihahanda sa isang naaangkop na dako sa labas ng simbahan. Kapag natitipon na ang mga tao, ang pari ay lalapit doon kasama ng mga tagapaglingkod. Isa sa mga ito ay siyang magdadala ng kandila ng Pasko ng Pagkabuhay.

P– Mga kapatid, sa kabanal-banalang gabing ito na pinangyarihan ng pagtawid ng ating Panginoong Hesukristo mula sa pagkamatay patungo sa pagkabuhay, ang Sambayanan niya ay nag-aanyaya sa lahat ng mga anak na nasa iba't ibang panig ng daigdig upang magtipun-tipon sa pagganap ng magdamagang pagdiriwang. Sa pagganap natin sa alaala ng Pasko ng Panginoong nagtagumpay sa pakikinig ng Salita at paghahain ng kanyang buhay, maaasahan nating tayo'y makakapakinabang sa kanyang pananaig sa kamatayan at pamumuhay sa piling niya at ng Amang Maykapal.

Pagbabasbas sa Apoy at Paghahanda sa Ilaw

N– Ang kadilimang bumabalot sa atin ay sumasagisag sa kadiliman ng libingan ni Hesus. Ang apoy na ating sinindihan ay sumasagisag sa liwanag ng pag-ibig ng Diyos na bumuhay sa Kanyang Anak na si Hesus na naging liwanag ng ating mga buhay.



P– Ama naming makapangyarihan, sa pamamagitan ng iyong Anak kami'y iyong dinulutan ng ningas ng iyong kaliwanagan. Ang bagong ningas na ito ay iyong gawing banal (✠) at ipagkaloob mong kami'y pagningasin nitong aming pagdiriwang upang makasapit kaming may dalisay na kalooban sa walang maliw na kaliwanagan sa pamamagitan ni Hesukristo kasama ng Espiritu Santo magpasawalang hanggan.

B– Amen!

N– Ang kandila ng Pasko ng Pagkabuhay ay sumasagisag kay Kristong Muling Nabuhay. Tulad ng kandilang ito na pinagmumulan ng ilaw para sa lahat, gayundin naman, si Hesus ang ilaw na nagbibigay-liwanag sa kadiliman ng buhay na ito, sa ating daan patungo sa Ama.

Habang ginuguhitan ng pari ang kandila ng Pasko ng Pagkabuhay ng hugis-krus, at mga titik na “Alpha” (A) at “Omega” (Ω) at mga tambil-

lang ng taong 2019, sasabihin niya:

P– Si Kristo ang nagmamahal noon sa bayang hinirang, ngayon pa ri'y s'yang patnubay: Si Hesukristo'y nabuhay, s'ya'y ating kaliwanagan.

Si Kristo ang nagmamahal simula pa noong araw, wakas natin s'ya't hantungan: Si Hesukristo'y nabuhay, s'ya'y ating kaliwanagan.

Si Kristo ang pinagmulan: *alpha*'y sagisag n'yang tunay. S'ya'y ating pinanggalingan: Si Hesukristo'y nabuhay, s'ya'y ating kaliwanagan.

Si Kristo ang s'yang hantungan: *omega*'y kanyang larawan, s'ya ang ating patunguhan: Si Hesukristo'y nabuhay, s'ya'y ating kaliwanagan.

Kay Kristo ay nabibilang lahat ng panaho't araw, bawat yugto ng pag-iral: Si Hesukristo'y nabuhay, s'ya'y ating kaliwanagan.

Kay Kristo ay nabibilang mga taong daan-daan, Hari s'ya ng kaysaysayan: Si Hesukristo'y nabuhay, s'ya'y ating kaliwanagan.

Kay Kristo ang karangalan, lahat ng kapangyarihan. Panginoong dinarantal: Si Hesukristo'y nabuhay, s'ya'y ating kaliwanagan.

Kay Kristo ang kapurihan ng buong sangkatauhan ngayon at magpakailanman. Si Hesukristo'y nabuhay, s'ya'y ating kaliwanagan.

Itutusok ng pari ang limang butil ng insenso sa kandila ayon sa balangkas ng krus habang ipinahahayag:

P– Sa sugat na lubhang banal ni Hesus sa tagiliran, dugo't tubig ay lumitaw. Si Hesukristo'y nabuhay, s'ya'y ating kaliwanagan.

May sugat sa paang kanan si Hesus na nabayubay sa krus na kinamatayan. Si Hesukristo'y nabuhay, s'ya'y ating kaliwanagan.

Ang kaliwang paa naman ni Hesus din ay sugatan, pako'y naglagos na tunay: Si Hesukristo'y nabuhay, s'ya'y ating kaliwanagan.

At sa kanan niyang kamay si Hesus di'y pinakuan kaya't may sugat na taglay: Si Hesukristo'y nabuhay, s'ya'y ating kaliwanagan.

Sa kanyang kaliwang kamay si Hesus ay pinakuan noong buhay n'ya'y ialay. Si Hesukristo'y nabuhay, s'ya'y ating kaliwanagan.

Sisindihan ng pari o diyakono ang kandila mula sa bagong basbas na apoy habang ipinahahayag:

P— Mapawi nawang tuluyan ang dilim ng kasalanan sa puso nati't isipan: Si Hesukristo'y nabuhay, s'ya'y ating kaliwanagan.

Prusisyon

Itataas ng pari o diyakono ang kandila ng Pasko ng Pagkabuhay habang inaawit:

P— Tayo nang magbigay dangal kay Hesus na ating ilaw sa diwa nati't isipan. Si Hesukristo'y nabuhay, s'ya'y ating kaliwanagan.

B— **Salamat po, Poong banal, sa ilaw na iyong bigay upang kami ay tanglawan. Si Hesukristo'y nabuhay, s'ya'y ating kaliwanagan!**

Lahat ay papasok sa simbahan sa pangunguna ng may dala ng kandila ng Pasko ng Pagkabuhay. Sa pintuan ng simbahan, itataas ang kandila ng Pasko ng Pagkabuhay, at aawitin sa ikalawang pagkakataon:

P— Tayo nang magbigay dangal kay Hesus na ating ilaw sa diwa nati't isipan. Si Hesukristo'y nabuhay, s'ya'y ating kaliwanagan.

B— **Salamat po, Poong banal, sa ilaw na iyong bigay upang kami ay tanglawan. Si Hesukristo'y nabuhay, s'ya'y ating kaliwanagan!**

Lahat ay magsisindi ng kanilang kandila mula sa kandila ng Pasko ng Pagkabuhay at magpapatuloy ang prusisyon. Pagdating ng pari/diyakono sa dako ng dambana, haharap siya sa mga tao at aawitin sa ikatlong pagkakataon:

P— Tayo nang magbigay dangal kay Hesus na ating ilaw sa diwa nati't isipan. Si Hesukristo'y nabuhay, s'ya'y ating kaliwanagan.

B— **Salamat po, Poong banal, sa ilaw na iyong bigay upang kami ay tanglawan. Si Hesukristo'y nabuhay, s'ya'y ating kaliwanagan!**

Ang Maringal na Pagpapahayag na Ngayo'y Pasko ng Pagkabuhay

(Maikling Paraan)

Ang mga ilaw sa simbahan ay sisindihan. Ilalagay ang kandila sa patungan o kandilero nito malapit sa dakong nakalaan para sa mga pagbasa at iinsensuhan. Ang diyakono/pari ay aawit ng paghahayag ng Pagkabuhay.

P— Magalak ngayo't magdiwang, mga anghel na kinapal, lahat tayo'y mag-awitan: Si Hesukristo'y nabuhay, s'ya'y ating kaliwanagan.

Tambuli ng kaligtasan, maghudyat ng kagalakan, magsaya ang sanlibutan. Si Hesukristo'y nabuhay, s'ya'y ating kaliwanagan.

Hinirang na sambayanan, bumubuo ng Simbahan, magsaya sa kaningningan. Si Hesukristo'y nabuhay, s'ya'y ating kaliwanagan.

Ang puso nati't isipan itaas sa kalangitan, ang Ama'y pasalamat. Si Hesukristo'y nabuhay, s'ya'y ating kaliwanagan.

Ngayon nga ang kapistahan ng Panginoong namatay ukol sa 'ting kalayaan. Si Hesukristo'y nabuhay, s'ya'y ating kaliwanagan.

Ngayon nga ang pagdiriwang ng muli nating pagsilang sa tubig ng kaligtasan. Si Hesukristo'y nabuhay, s'ya'y ating kaliwanagan.

D'yos Ama ng sanlibutan, pag-ibig mo't katapatan, patawad sa ami'y bigay. Si Hesukristo'y nabuhay, s'ya'y ating kaliwanagan.

Hain namin itong ilaw, sagisag ng matagumpay na Anak mong minamahal. Si Hesukristo'y nabuhay, s'ya'y ating kaliwanagan.

Papatayin ang sindi ng mga kandila. Muli itong sisindihan sa Pagsasariwa ng Pangako sa Binyag.

IKALAWANG YUGTO

PAGPAPAHAYAG NG SALITA NG DIYOS



P— Mga kapatid, ngayong nasimulan na natin ang Magdamagang Pagdiriwang ng Muling Pagkabuhay, makinig tayong mabuti sa Salita ng Diyos, isaloob natin kung paano niyang ginaganap sa iba't ibang yugto ng kasaysayan ang pagliligtas niya sa mga hinirang na tao. Noon ngang sumapit ang itinakda niyang panahon, ang kanyang sariling Anak ang kanyang sinugo upang maging ating Tagapagligtas. Hilingin natin sa Diyos ang kaganapan ng kaligtasan na nangyari ngayon sa pagdiriwang ng Pasko ng pagtubos sa tanan.

Unang Pagbasa Gen 1:1.26-31



(**T**—Tagapagsalaysay, **D**—Diyos.)

L—Pagpapahayag mula sa Aklat ng Genesis

T—Nang simulang likhain ng Diyos ang lupa at ang langit, sinabi ng Diyos:

D—Ngayon, lalangin natin ang tao. Ating gagawin siyang kalarawan natin. Siya ang mamamahala sa mga isda, mga ibon at lahat ng hayop, maging maamo o mailap, malaki o maliit.

T—Nilalang nga ng Diyos ang tao ayon sa kanyang larawan. Lumalang siya ng isang lalaki at isang babae, at sila'y pinagpala. Wika niya,

D—Magpakarami kayo at punuin ng inyong mga supling ang buong daigdig, at pamahalaan ito. Binibigyan ko kayo ng kapangyarihan sa mga isda, sa mga ibon, at sa lahat ng mailap na hayop, maging malalaki o maliit. Binigyan ko rin kayo ng lahat ng uri ng butil at mga bungangkahoy na inyong makakain. Ang lahat ng halamang luntian ay ibibigay ko naman sa mailap na hayop, malaki man o maliit, at sa lahat ng mga ibon.

T—At ito nga ang nangyari. Pinagmasdan ng Diyos ang lahat niyang ginawa, at lubos siyang nasiyahan.

Ang Salita ng Diyos!

B—Salamat sa Diyos!

Salmong Tugunan Awit 103

B—*Espiritu mo'y suguin, Poon, tana'y 'yong baguhin!*

R. M. Velez

Es---pi--ri--tu mo'y su-gu-in, Po-
on, ta--na'y 'yong ba-gu-hin!

* Pinupuri ka, Poong Diyos, nitong aking kaluluwa. Ikaw, Panginoong Diyos ko, kay dakila mong talaga! Ang taglay mong kasuuta'y dakila ri't marangal pa. Nababatbat ka, Poong Diyos, ng liwanag na kay ganda. **B**

* Ikaw na rin ang nagtayo ng saligan nitong lupa, matatag na ginawa mo't hindi ito mauuga. Ang ibabaw

ng saliga'y ginawa mong karagatan, at tubig din ang bumalot sa lahat ng kabundukan. **B.**

* Lumilikha ka ng ilog na patungong kapatagan, sa gilid ng mga burol, umaagos na marahan. Sa naroonng kakahuya'y umaawit nang masaya, mga ibo'y nagpupugad sa malabay nilang sanga. **B.**

* Magmula sa kalangitan, mga bundok ay nadilig, ibinuhos ang biyaya't lumaganap sa daigdig. Tumubo ang mga damong pagkain ng mga baka. Nagkaroon ng halamang masaganang namumunga; anupa't ang mga tao'y may pagkaing nakukuha. **B.**

* Sa daigdig, Panginoon, kay rami ng iyong likha pagkat ikaw ay marunong kaya ito ay nagawa, ang dami ng nilikha mong nakalaganap sa lupa. Panginoon'y purihin mo, purihin mo, kaluluwa! Purihin ang Panginoon, O purihin mo nga siya! **B.**

Panalangin

P— Ama naming makapangyarihan, sa iyong kagandahang-loob kami'y iyong nilikha at sa iyong pagtatangkilik kami'y iyong pinadakila. Ipagkaloob mong ang aming matatag na kalooban ay manaig sa kasalanang nagbibigay-baladik sa aming pagiging marapat na sa iyong ligaya'y sumapit, sa pamamagitan ni Heskristo kasama ng Espiritu Santo magpasawalang hanggan.

B— Amen!

Ika-2 Pagbasa Gen 22:1-2.9.10-13.15-18
(**T**— Tagapagsalaysay, **D**— Diyos)



L— Pagpapahayag mula sa Aklat ng Genesis

T— Noong mga araw na iyon: Sinubok ng Diyos si Abraham. Tinawag siya ng Diyos at tumugon naman siya. Sinabi sa kanya,

D— Isama mo ang pinakamamahal mong anak na si Isaac, at magpunta kayo sa lupain ng Moria. Umakyat kayo sa bundok na ituturo ko sa iyo, at ihandog mo siya sa akin.

T— Pagsapit nila sa dakong itinuro ng Diyos, gumawa ng dambana si Abraham. Inayos niya sa ibabaw nito ang panggatong. Nang sasaksakin na niya ang bata, tinawag siya ng anghel ng Panginoon at mula sa langit ay sinabi:

D— Abraham, Abraham! Huwag mong patayin ang bata. Huwag mo siyang saktan! Naipakita mo nang handa kang

sumunod sa Diyos, sapagkat hindi mo ipinagkait sa kanya ang kaisa-isa at pinakamamahal mong anak.

T— Paglingon niya'y may nakita siyang isang lalaking tupa na ang mga sungay ay napasabit sa mga sanga ng kahoy. Ito ang kinuha ni Abraham at inihandog kapalit ng kanyang anak. Mula sa langit, nagsalitan muli kay Abraham ang anghel ng Panginoon. Wika nito,

D— Akong Panginoon ang nangangako sa iyo: yamang hindi mo ipinagkait sa akin ang kaisa-isa mong anak, pagpapalain kita. Ang lahi mo'y magiging sindami ng bituin sa langit at ng buhangin sa dagat. Lulupigin nila ang mga lunsod ng kanilang mga kaaway. Sa pamamagitan ng iyong lahi, pagpapalain ang lahat ng bansa sa daigdig sapagkat ikaw ay tumalima sa akin.

Ang Salita ng Diyos!

B— Salamat sa Diyos!

Salmong Tugunan Awit 15

B— *D'yos ko, ang aking dalangi'y ako'y iyong tangkilikin!*

R. M. Velez



* Ikaw lamang, Panginoon, ang lahat sa aking buhay, ako'y iyong tinutugon sa lahat kong kailangan; ang biyayang kaloob mo ay kahanga-hangang tunay. Nababatid ko na ika'y kasama ko oras-oras, sa piling mo kailanma'y hindi ako matitinag. **B.**

* Kaya't ako'y nagdiriwang, ang diwa ko'y nagagalak, ang lagi kong nadarama'y hindi ako matitinag. Pagkat di mo tutulutang ang mahal mo ay malagak, sa balon ng mga patay upang doon ay maagnas. **B.**

* Ituturo mo ang landas na buhay ang hahantungan, sa piling mo'y madarama ang lubos na kagalakan; ang tulong mo'y nagdudulot ng ligayang walang hanggan. **B.**

Panalangin

P— Ama naming makapangyarihan, pinarami mo sa sanlibutan ang mga anak na sa pangako mo'y sumilang bunga ng paglawak ng saklaw ng iyong paghirang. Sa pagbibinyag, ginagawa mong matupad ang iyong pangakong si Abraham ay maging ama ng lahat. Ipagkaloob mong ang iyong sambayanan ay marapat na makatugon sa iyong panawagan, sa pamamagitan ni Heskristo kasama

ng Espiritu Santo magpasawalang hanggan.

B— Amen!

Ika-3 Pagbasa Exo 14:15-15:1

TL— *Lalaking Tagapagsalaysay,*

TB— *Babaeng Tagapagsalaysay,*

D— *Diyos*



L— Pagpapahayag mula sa Aklat ng Exodo

TL— Noong mga araw na iyon: Sinabi ng Panginoon kay Moises,

D— Bakit mo ako tinatawag? Palakarin mo ang mga Israelita. Itapat mo sa ibabaw ng dagat ang iyong tungkod; mahahati ang tubig at matutuyo ang lalakaran ninyo. Lalo kong pagmamatigasin ang mga Egipcio at pasusundan ko kayo sa kanila, ngunit doon sila lilipulin: ang mga Egipcio, ang mga kawal ng Faraon, pati ang kanilang mga karwahe. Ipakikita ko sa kanila ang aking kapangyarihan. Sa gayon, malalaman ng mga Egipciong iyan na ako ang Panginoon.

TL— Ang anghel ng Diyos na pumapatnubay sa paglalakbay ng mga Israelita ay nagpatihuli sa kanila, gayon din ang haliging ulap. Ang ulap ay lumagay sa pagitan ng mga Israelita at ng mga Egipcio at lumatag ang kadiliman.

TB— Dumating ang gabi at ang mga Egipcio ay di makalapit sa mga Israelita. Itinapat ni Moises ang kanyang tungkod sa ibabaw ng dagat. Magdamag na pinaihip ng Panginoon ang isang malakas na hangin mula sa silangan at nahati ang tubig. Ang mga Israelita'y bumagtas sa dagat na ang nilakara'y tuyong lupa, sa pagitan ng animo'y pader na tubig.

TL— Hinabol sila ng mga Egipcio, ng mga kawal, karwahe at kabayuhan ng Faraon. Nang magbubukang-liwayway na, ang mga Egipcio'y ginulo ng Panginoon mula sa haliging apoy at ulap. Nalubog ang gulong ng mga karwahe at hindi na sila makatugis nang matulin. **TB**— Kaya sinabi nila, "Umalis na tayo rito sapagkat ang Panginoon na ang kalaban natin." Sinabi ng Panginoon kay Moises,

D— Itapat mo ang iyong tungkod sa ibabaw ng dagat at tatabunan ng tubig ang mga Egipcio pati ng kanilang karwahe.

TL— Ganoon nga ang ginawa ni Moises, at pagbubukang-liwayway, nanumbalik sa dati ang dagat. Ang

mga Egipcio'y nagsikap makatakas ngunit pinalakas ng Panginoon ang dating ng tubig kaya't sila'y nalunod na lahat. Nang manauli ang dagat, natabunan ang mga karwahe't kabayo ng Faraon, pati ng kanyang mga kawal at walang natira isa man. Ngunit ang mga Israelita'y nakatawid sa dagat, na tuyo ang dinaanan, sa pagitan ng animo'y pader na tubig.

T^B –Nang araw na yaon ang mga Israelita'y iniligat ng Panginoon sa mga Egipcio; nakita nila ang bangkay ng mga Egipcio, nagkalat sa baybay-dagat. Dahil sa kapangyarihang ipinakita ng Panginoon laban sa mga Egipcio, nagkaroon sila ng takot sa kanya at sumampalataya sila sa kanya at sa alagad niyang si Moises. Ito ang inawit ni Moises at ng mga Israelita para sa Panginoon: “Ang Panginoon’y atin ngayong awitan sa kanyang kinamtang Dakilang tagumpay; ang mga kabayo’t kawal ng kaaway sa pusod ng dagat, lahat natabunan.”

Ang Salita ng Diyos!

B –Salamat sa Diyos!

Salmong Tugunan *Exo 15*

B –*Poon ay ating awitan sa kinamtan n'yang tagumpay!*

R. M. Velez

F C/E Dm
 Po---on ay a---ting a---wi---tan
 Dm/C Bb C7 F
 sa kinam---tan n'yang tagumpay!

* Ang Panginoon’y atin ngayong awitan sa kanyang kinamtang Dakilang tagumpay; ang mga kabayo’t kawal ng kaaway sa pusod ng dagat, lahat natabunan. Ako’y pinalakas niya’t pinatatag, siya ang sa aki’y nagkukop, nag-ingat, Diyos ng magulang ko, aking manliligtas. **B.**

* Siya’y mandirigma na walang kapantay, Panginoon’y kanyang pangalan. Nang ang mga kawal ng Faraon sa Dagat ng mga Tambo ay mangagsilusong, ang lahat ng ito ay kanyang nilunod pati na sasakya’y kanyang pinalubog. **B.**

* Sila’y natabunan ng alon ng dagat, tulad nila’y batong lumubog kaagad. Ang mga bisig mo ay walang katulad, wala ngang katulad, walang kasinlakas, sa isang hampas mo, kaaway nangalat, nangadurog mandin sa ‘yong mga palad. **B.**

* Sila’y dadalhin mo sa pinili mong bundok. Sa lugar na itinangi mo, para maging iyong lubos at sa santwaryong natayo ayon sa iyong loob. Ikaw, Poon, maghahari magpakailanman. **B.**

Panalangin

P– Ama naming makapangyarihan, ang idinudulot mong pagpapalaya noon sa iyong sambayanan mula sa pang-aapi ng haring sa kanila’y nagpapatay ay nababanaagan namin kahit sa aming kapanahunan sa inyong pagliligtas na iyong ginaganap sa muling pagsilang ng mga bininyagang mula sa iba’t ibang bansa at bayan. Ipagkaloob mong ang pagiging anak ni Abraham at ang dangal na sa Israel mapabilang ay maging lubos na kapalaran ng sanlibutan, sa pamamagitan ni Hesuskristo kasama ng Espiritu Santo magpasawalang hanggan.

B –Amen!

Ika-4 na Pagbasa: *Nilaktawan*

Ika-5 Pagbasa *Isa 55:1-11*

L– Pagpapahayag mula sa Aklat ni Propeta Isaia

Sinabi ng Panginoon, “Narito ang tubig, mga nauuhaw. Ang mga walang salapi ay kumuha rito at bumili ng pagkain. Halikayo at bumili ng alak at gatas, bumili kayo, ngunit walang bayad. Bakit ginugugol ang salapi sa mga bagay na hindi nakabubusog? Bakit inuubos ang pera sa mga bagay na walang halaga? Makinig kayo sa akin at sundin ang utos ko at matitikman ninyo ang pinakamasarap na pagkain. Pumarito kayo, kayo ay lumapit at ako’y pakinggan, makinig sa akin nang kayo’y mabuhay; ako’y may gagawing walang hanggang tipan, at ipalalaspas sa inyo ang pagpapalang ipinangako ko kay David. Ginawa ko siyang hari at puno ng mga bansa at sa pamamagitan niya’y ipinamalas ang aking kapangyarihan. Iyong tatawagin ang mga bansang hindi mo kilala, mga bansang di ka kilala’y sa iyo pupunta, dahilan sa Panginoon, Banal ng Israel, ang Diyos na nagpala’t sa iyo’y dumakila.” Hanapin ang Panginoon samantalang siya’y iyong makikita, siya ay tawagin habang malapit pa. Ang mga gawain ng taong masama’y dapat nang talikdan, at ang mga liko’y dapat magbago na ng maling isipan; sila’y manumbalik, lumapit sa Panginoon upang kahabagan, at mula sa Diyos, matatamo nila ang kapatawaran. Ang wika ng Panginoon: “Ang aking isipa’y di ninyo isipan, at magkaiba ang ating daan. Kung paanong ang langit higit na mataas, mataas sa lupa, ang daa’t isip ko’y hindi maaabot ng inyong akala. Ang ulan at niyebe paglagpak sa lupa’y di na nagbabalik, aagos na ito sa balat ng lupa’t nagiging pandilig, kaya may pagkai’t butil na panghasik. Ganyan din ang aking mga salita, magaganap nito ang lahat kong nasa.”

Ang Salita ng Diyos!

B –Salamat sa Diyos!

Salmong Tugunan *Isa 12*

B – *May galak tayong sumalok sa batis ng Manunubos!*

R. M. Velez

D G D
 May ga---lak tayong suma---lok

G A7 D
 sa ba---tis ng Manu--nu---bos!

* Ang Diyos ang siyang nagliligtas sa akin, tiwalang-tiwala ako at wala munti mang pangamba. Sapagkat ang Poon ang lahat sa akin, siya ang aking awit, ang aking kaligtasan. Malugod kayong sasalok ng tubig sa batis ng kaligtasan. **B.**

* Magpasalamat kayo sa Poon, siya ang inyong tawagan; ipaalam ninyo sa mga bansa ang kanyang ginawa. Ipahayag ninyo ang kadakilaan ng kanyang pangalan. **B.**

* Umawit kayo ng papuri sa Poon, sapagkat kahanga-hanga ang kanyang mga ginawa, ipahayag ninyo ito sa buong daigdig. Mga anak ng Sion, umawit kayo nang buong galak, sapagkat nasa piling ninyo ang dakila at ang banal ng Israel. **B.**

Panalangin

P– Ama naming makapangyarihan, ang sanlibutan ay walang ibang inaasahan kundi ikaw na sa pahayag ng iyong mga propeta ay naglalahad ng iyong balak na maganda. Malugod mong pagyamanin ang aming pananalig sapagkat wala kaming makakamit nang hindi mo iniibig para kami’y sa iyo mapalapit, sa pamamagitan ni Hesuskristo kasama ng Espiritu Santo magpasawalang hanggan.

B –Amen!

Ika-6 na Pagbasa: *Nilaktawan*

Ika-7 Pagbasa: *Nilaktawan*

Sisindihan ang mga kandila sa dambana, pasisimulan ng pari ang pag-awit ng “Papuri sa Diyos,” at patutugtugin ang mga kampana ng simbahan.

Papuri

B–Papuri sa Diyos sa kaitaasan at sa lupa’y kapayapaan sa mga taong kinalulugdan niya. Pinupuri ka namin, dinarangal ka namin, sinasamba ka namin, ipinagbubunyi ka namin, pinasasalamat ka namin dahil sa dakila mong angking kapurihan. Panginoong Diyos, Hari ng langit,

Diyos Amang makapangyarihan sa lahat.

Pangoong Hesukristo, Bugtong na Anak, Pangoong Diyos, Kordero ng Diyos, Anak ng Ama. Ikaw na nag-aalis ng mga kasalanan ng sanlibutan, maawa ka sa amin. Ikaw na nag-aalis ng mga kasalanan ng sanlibutan, tanggapin mo ang aming kahilingan. Ikaw na naluluklok sa kanan ng Ama, maawa ka sa amin. Sapagkat ikaw lamang ang banal, ikaw lamang ang Panginoon, ikaw lamang, O Hesukristo, ang Kataas-taasan, kasama ng Espiritu Santo sa kadakilaan ng Diyos Ama. Amen!

Panalanging Pambungad

P– Ama naming makapangyarihan, ang kabanal-banang gabing ito ay pinaglilwanag mo sa kadakilaan ng pagkabuhay ni Kristo. Antigin mo ang Espiritu ng pagkukop mo upang sa pagbabago ng aming buong pagkatao, kami’y wagas na makapaglingkod sa iyo, sa pamamagitan ni Hesukristo kasama ng Espiritu Santo magpasawalang hanggan.

B– Amen!

Sulat

Ro 6:3-11

L– Pagpapahayag mula sa Sulat ni Apostol San Pablo sa mga taga-Roma

Mga kapatid: Hindi ba ninyo nalalaman na tayong lahat na nabinyagan kay Kristo Hesus ay nabinyagan sa kanyang kamatayan? Samakatwid, tayo’y namatay at nalibing na kasama niya sa pamamagitan ng binyag upang kung paanong binuhay na muli si Kristo sa pamamagitan ng dakilang kapangyarihan ng Ama, tayo nama’y mabuhay sa isang bagong pamumuhay.

Sapagkat kung nakaisa tayo ni Kristo sa isang kamatayang tulad ng kanyang kamatayan, tiyak na makakaisa niya tayo sa isang muling pagkabuhay tulad ng kanyang pagkabuhay. Alam natin na ang dati nating pagkatao ay ipinakong kasama niya upang mamatay ang makasalang katawan at nang hindi na tayo maalipin pa ng kasalanan. Sapagkat ang namatay na ay pinalaya mula sa kapangyarihan ng kasalanan. Ngunit tayo’y naniniwalang mabubuhay tayong kasama ni Kristo kung namatay tayong kasama niya. Alam nating si Kristo na muling binuhay ay hindi na muling mamamatay. Wala nang kapangyarihan sa kanya ang kamatayan. Nang siya’y mamatay, namatay siya nang minsanan para sa kasalanan, at ang buhay niya ngayo’y para sa Diyos. Kaya dapat ninyong ibalang ang inyong sarili na patay na sa kasalanan datapat buhay naman

para sa Diyos sa inyong pakikipag-isa kay Kristo Hesus.

Ang Salita ng Diyos!

B– Salamat sa Diyos!

Aleluya

Aawitin ng pari ang “Aleluya!” at sasagot naman ang mga tao. Makatlong ulit itong aawitin, pataas nang pataas sa bawat ulit.


Gregorian Chant



Salmong Tugunan Awit 117

B– Aleluya! Aleluya! Aleluya!

R. M. Velez



* O pasalamatang ang D'yos na Panginoon, pagkat siya’y mabuti; ang kanyang pag-ibig ay napakatag at mananatili. Ang taga-Israel, bayaang sabihit kanilang ihayag, “Ang pag-ibig ng Diyos ay hindi kukupas.” **B.**

* Ang lakas ng Poon, ang siyang nagdulot ng ating tagumpay sa pakikibaka sa ating kaaway. Aking sinasabing di ako papanaw, mabubuhay ako upang isalaysay ang gawa ng Diyos na Panginoon ko. **B.**

* Ang batong natakwil ng nangagtatayo ng tirahang-bahay, sa lahat ng bato’y higit na mahusay. Ang lahat ng ito ang nagpamalal sa Panginoong Diyos. Kung iyong mamasdan ay kalugud-lugod. **B.**

Mabuting Balita Lu 24:1-12

P– Ang Mabuting Balita ng Panginoon ayon kay San Lucas
B– Papuri sa iyo, Panginoon!

Umagang-umaga nang araw ng Linggo, ang mga babae’y nagtungo sa libingan, dala ang mga pabangong

inihanda nila. Nang dumating sila, naratnan nilang naigulong na ang batong nakatakip sa pintuan ng libingan. Ngunit nang pumasok sila, wala ang bangkay ng Pangoong Hesus. Samantalang nagugulo ang kanilang isip tungkol dito, nakita nila’t sukat sa tabi nila ang dalawang lalaking nakasisilaw ang damit. Dahil sa matinding takot, sila’y lumuhod, sayad ang mukha sa lupa. Tinanong sila ng mga lalaki, “Bakit ninyo hinahanap ang buhay sa gitna ng mga patay? Wala na siya rito – siya’y muling nabuhay! Alalahanin ninyo ang sinabi niya sa inyo noong nasa Galilea pa siya: ‘Ang Anak ng Tao ay kailangang maipagkanulo sa mga makasalanan at maipako sa krus, at sa ikatlong araw ay muling mabuhay.’” At naalaala ng mga babae ang mga sinabi niya. Pagbabalik mula sa libingan, isinalaysay nila ang lahat ng ito sa Labing-isa at sa iba pang kasama nila. Ang mga babaing ito’y sina Maria Magdalena, Juana, at Mariang ina ni Santiago; sila at ang iba pang mga babaing kasama nila ang nagbalita nito sa mga apostol. Ngunit inakala ng mga apostol na kahibangan lamang ang kanilang sinabi, kaya hindi nila pinaniwalaan ang mga babae. Gayunma’y tumindig si Pedro at patakpong nagpunta sa libingan. Yumukod siya at pagtingin sa loob ay wala siyang nakita kundi ang mga kayong lino. Kaya’t umuwi siyang nagtataka sa nangyari.

Ang Mabuting Balita ng Panginoon!

B– Pinupuri ka namin, Panginoong Hesukristo!

Homiliya



A. *Kung may bibinyagan, magsalita ang pari sa mga tao ng:*

P– Sa mga pagluhog natin, mga minamahal na kapatid, tulungan natin ang ating mga kapatid nang may pananalig upang ang Ama nating makapangyarihan ay siyang tumangkilik sa mga isisilang sa binyag pakundangan sa kanyang pag-ibig.

Pagbabasbas sa Tubig

P– Ama naming makapangyarihan, bagama’t natatago sa aming paningin, ang kapangyarihan mong maggawad ng iyong buhay sa amin ay inilalahad ng mga pananda ng iyong paglagi sa aming piling anupa’t ang tubig na iyong nilikha ay naging tagapagpahayag ng iyong

pagpapala.

Ama namin, noong ang daigdig ay iyong lalangin, ang iyong Espiritu ay lumulukob na sa tubig bilang simoy ng hangin upang ang kakayanan nitong bumuhay ay maging tagapagdulot ng iyong kabanalan.

Ama namin, ang sansinukob ay iyong panibagong ginawa noong ipahintulot na magkaroon ng malaking baha upang ipahiwatig na ang tubig ay may katangian na tumapos sa kasamaan at magpasimula ng kabutihan.

Ama namin, ang mga anak ni Abraham ay pinatawid mo sa karagatan noong sila'y palayain mo sa pagkaalipin sa Egipto upang ipahiwatig ang mangyayari sa mga bibinyagan bilang mga kaanib sa iyong sambayanan.

Ama namin, niloob mong noong binyagan ni Juan sa Ilog Jordan ang Anak mo ay maganap ang paglukob sa kanya ng Espiritu Santo. Niloob mong dumaloy ang dugo at tubig sa sinibat na puso ng Anak mong iniibig.

Niloob mong mabuhay muli ang iyong Anak ng nag-utos sa mga alagad: "Humayo kayo at gawin ninyong alagad ko ang lahat ng bansa. Binyagan ninyo sila sa ngalan ng Ama at ng Anak at ng Espiritu Santo."

Magtaglay nawa itong tubig ng pagpapalang kaloob ng Espiritu Santo na idinudulot ng mahal na Anak mo upang ang mga tao na pawang nilikha ayon sa iyong larawang dakila ngunit nasadlak sa lusak ng kasalanan ay mahugasan ngayong sila'y bibinyagan para makabangong taglay ang iyong kalinisan sa muling pagsilang sa tubig at Espiritu Santo bilang mga kaanib ng iyong angkan.

Ilulubog sa tubig ng pari ang kandila ng Pasko ng Pagkabuhay habang kanyang ipinahahayag:

P– Ama namin, iniluluhog namin sa iyo, manaog nawa sa tubig na ito ang kapangyarihan ng Espiritu Santo sa pamamagitan ni Hesukristo upang mapuspos ng iyong Espiritu itong pambinyag na tubig

Hahawakan ng pari ang kandilang nakatayo sa tubig:

P– at sa gayo'y lahat ng nakikiisa sa kamatayan niya sa pamamagitan ng binyag ay muling mabuhay na siya rin ang kasama bilang Tagapamagitan kasama ng Espiritu Santo magpasawalang hanggan.

B – Amen!

B – Kaisa ng mga bukal ng tubig sa sanlibutan – batis, ilog, karagatan – aming pinapupurihan pag-ibig mong walang hanggan!

Pagbibinyag

Ang pagbibinyag ay gagawin sa nakaugaliang paraan.

B. *Kung walang bibinyagan, basbasan ng pari ang tubig sa sumusunod na panalangin:*

P– Mga kapatid kong minamahal, hilingin natin sa Ama nating makapangyarihan na marapatin niyang basbasan itong tubig na iwiwisik ngayon bilang paggunita sa tinanggap nating binyag noon. Pagkalooban nawa niya tayo ng panibagong lakas para sa pamamalagi matapat sa Espiritu Santo na ating tinanggap. (*Tumahimik sandali.*)

Ama naming makapangyarihan, ipahayag mong ikaw ay kapiling ng iyong sambayanan sa pagdiriwang na ito ng gabi ng pagkabuhay. Ginugunita namin ang iyong paglikha na talaga namang kahanga-hanga at gayundin ang iyong pagtubos sa amin na lalo pang pambihira at walang kahambing. Basbasan mo itong tubig (✠) na iyong ginawa upang aming magamit para ang mga tanim ay madilig para makapawi sa uhaw at init, at para maganap namin ang paglilinis. Ito rin ay iyong itinalagang gamitin sa pagbibigay ng iyong kagandahangloob sa tanan. Ginamit mo ito sa pagpapalaya sa kaalipinan ng iyong hinirang na sambayanan. Habang sa disyerto sila'y naglalakbay, tubig ang pumawi sa kanilang pagkauhaw. Tubig din ang ginamit ng iyong mga propeta upang ang sisimulan mong pakikipagtipan sa tao ay maipahayag nila. Sa pamamagitan ng tubig na itinalagang maging banal ng Anak mong mahal noong siya'y lumusong sa Ilog Jordan, pinagbabago mo kaming mga makasalanan. Ito nawang tubig na ngayo'y iwiwisik sa amin upang ang pagbibinyag ay aming gunitain ay magpahiwatig din nawa ng aming pakikigalak sa kaligayahan ng aming mga kapatid na tatanggap ng binyag sa Paskong ito ng Pagkabuhay ng iyong Anak na namamagitan kasama ng Espiritu Santo magpasawalang hanggan.

B – Amen!

Pagsasariwa ng Pangako sa Pagbibinyag

(Sa halip na Sumasampalataya)

Lahat ay tatayong may sindi ang kanilang kandila.

P– Mga kapatid, sa misteryo ng Pas-

ko ng Pagkamatay at Pagkabuhay ni Kristo, tayo'y nalibing kasama niya noong tayo'y binyagan upang kasama rin niya tayo'y makabangon at makapagbagong-buhay. Naganap na natin ang Apatnapung Araw na Paghahanda, kaya't sariwain natin ngayon ang ating pangako sa pagbibinyag. Talikdan natin ang kasamaan at kasalanan. Harapin natin ang matapat na paglilingkod sa Diyos bilang mga maaasahang kaanib ng kanyang banal na Simbahang Katolika. Kung kayo'y makapangangakong tatalikod sa lahat ng hadlang sa katuparan ng panukala ng Diyos upang kayo'y makapamuhay bilang matapat at maaasahang kaanib ng kanyang angkan, pakisagot ninyo itong tatlong katanungan.

Para kayo makapamuhay bilang mga malayang anak ng Diyos, ang kasalanan ay itinatakwil ba ninyo?

B – Opo, itinatakwil namin!

P– Para kayo'y huwag mapailalim sa kasalanan, ang kaakit-akit na tukso ng kasamaan ay itinatakwil ba ninyo?

B – Opo, itinatakwil namin!

P– Si Satanang pinanggagalingan ng kasalanan at pinuno ng kadiliman ay itinatakwil ba ninyo?

B – Opo, itinatakwil namin!

P– Ngayon nama'y ating harapin ang ating pananampalataya. Kung kayo'y makapangangakong magsisikap mamuhay bilang mga ikinararangal na anak ng Diyos Ama, kung tutularan ninyo siya sa kanyang kabutihan, pagmamahal sa lahat, at pagmamalasakit para sa pangkalahatang kapakanan, pakisagot ninyo ang katanungang ito: Sa Diyos Amang makapangyarihan sa lahat at Lumikha ng langit at lupa, kayo ba ay sumasampalataya?

B – Opo, sumasampalataya kami!

P– Kung kayo'y makapangangakong magsisikap mamuhay bilang mga tunay na kapatid ng Panginoong Hesus, kung gagawin ninyong simulain sa buhay ang kanyang katwiran, katarungan, at paglilingkod sa lahat alinsunod sa kanyang pagmamahal, pakisagot ninyo ang katanungang ito: Sa iisang Anak ng Diyos, ang ating Panginoong Hesukristo, na ipinanganak ni Santa Mariang Birhen, ipinako sa krus, namatay, inilibing, muling nabuhay at naluluklok sa kanan ng Ama, kayo ba ay sumasampalataya?

B – Opo, sumasampalataya kami!

P– Kung kayo'y makapangangakong susunod sa patnubay ng Espiritu Santo at kung sisikapin

ninyong mapaunlad ang kaloob niyang buhay at pagmamahal upang maging mga maipagmamalaking anak ng Diyos Ama at kapatid ng Panginoong Hesus, pakisagot ninyo ang katanungang ito: Sa Espiritu Santo, sa Banal na Simbahang Katolika, sa kasamahan ng mga banal, sa kapatawaran ng mga kasalanan, sa muling pagkabuhay ng mga namatay, at sa buhay na walang hanggan, kayo ba ay sumasampalataya?

B—Opo, sumasampalataya kami!

P— Bunga ng pagmamahal ng Diyos na makapangyarihang Ama ng ating Panginoong Hesuskristo, tayo ay pinatawad sa ating kasalanan noong tayo'y muling isilang sa tubig at Espiritu Santo. Tulungan nawa niya tayong mamalaging tapat sa ating Panginoong Hesuskristo ngayon at magpasawalang hanggan.

B—Amen!

Ang mga tao ay babasbasan ng pari. Maaaring umawit ng akmang awitin tungkol sa binyag.

Panalangin ng Bayan

P— Hingin natin sa Diyos na mapuno tayo ng ligaya sa Muling Pagkabuhay ng Kanyang Anak. Ang ating sasambitin ay:

B—Ama ng kaluwalhatian, dinggin Mo ang aming panalangin!

* Para sa mga namumuno sa Simbahan, upang maikalat nila sa buong Bayan ng Diyos ang ligaya ng Muling Pagkabuhay ni Kristo, manalangin tayo sa Panginoon!**B.**

* Para sa lahat ng mga kabataan ng ating bayan, upang sa taong ito ng mga kabataan ay mapuspos sila ng tunay na ligaya at maiwaksi ang anumang nagdadala ng kalungkutan sa kanilang buhay, manalangin tayo sa Panginoon!**B.**

* Para sa mga namumuno sa ating bansa, upang mapasaya nila ang ating mga kababayan sa pag-asa sa isang bagong daigdig na puno ng katarungan, pag-unlad, at kapatiran, manalangin tayo sa Panginoon!**B.**

* Para sa mga taong nawawalan na ng pag-asa sa buhay, upang makita nila sa Muling Pagkabuhay ni Kristo walang dilim ang hindi kayang silayan ng busilak na liwanag ng kaluwalhatian ng Poong Maykapal, manalangin tayo sa Panginoon!**B.**

* Para sa ating lahat na nagkakati-pon sa magdamagang pagdiriwang na ito, upang maglakas-loob tayong

tawirin ang maluwalhating tulay mula sa dilim ng kalungkutan tungo sa liwanag ng dalisay na kaligayahan, manalangin tayo sa Panginoon!**B.**

* Taimtim tayong manalangin para sa ating mga sariling kahilingan. (*Tumahimik sandali.*)

Manalangin tayo!**B.**

P—Ama naming puno ng kaluwalhatian, ibuhos Mo sa amin ang Iyong Banal na Espiritu upang kaming nakaisa ng Iyong Anak sa binyag ay makaahon mula sa kamatayan ng aming mga kasalanan tungo sa kaluwalhatian ng buhay na walang hanggan sa kanyang piling. Hinihiling namin ito sa pamamagitan ng Iyong maluwalhating Anak na si Hesuskristong aming Panginoon.**B—Amen!**

IKAAPAT NA YUGTO

PAGDIRIWANG
NG HULING HAPUNAN



P— Manalangin kayo . . .

B—Tanggapin nawa ng Panginoon itong paghahain sa iyong mga kamay sa kapurihan niya at karangalan, sa ating kapakinabangan at sa buong Sambayanan niyang banal.

Panalangin ukol sa mga Alay

P— Ama naming Lumikha, tanggapin mo ang aming mga panalangin na sumasaliw sa aming paghahain upang sa nagsimulang Pasko ng Pagkabuhay kami'y itaguyod nito sa kagalingang walang katapusan sa pamamagitan ni Hesuskristo kasama ng Espiritu Santo magpasawalang hanggan.

B—Amen!

Prepasyo

P— Ama naming makapangyarihan, tunay ngang marapat na ikaw ay aming pasalamatang ngayong gabing ipinagdiriwang ang paghahain ng Mesiyas, ang maamong tupa na tumubos sa aming lahat.

Ang iyong Anak na minamahal ay naghain ng sarili niyang buhay. Siya ang tupang maamong umako sa kaparusahan upang mapatawad ang kasalanan ng sanlibutan. Sa pagkamatay niya sa banal na krus ang kamatayan namin ay kanyang nilupig. Sa pagkabuhay niya bilang Manunubos, pag-asa't pagkabuhay ay aming nakamit.

Kaya kaisa ng mga anghel na nagsisiawit ng papuri sa iyo nang walang humpay sa kalangitan,

kami'y nagbubunyi sa iyong kadakilaan:

B—Santo, santo, santo . . .

Pagbubunyi

B—Sa krus mo at pagkabuhay kami'y natubos mong tunay, Poong Hesus naming mahal, iligtas mo kaming tanan ngayon at magpakailanman!

PAKIKINABANG



B—Ama namin . . .

P— Hinihiling namin . . .

B—Sapagkat iyo ang kaharian at ang kapangyarihan at ang kapurihan magpakailanman! Amen!

Paanyaya sa Kapayapaan

Paghahati-hati sa Tinapay

B—Kordero ng Diyos . . .

Paanyaya sa Pakikinabang

P— Ito ang Kordero ng Diyos na nag-aalis ng mga kasalanan ng sanlibutan. Mapalad ang mga inanyayahan sa kanyang piging.

B—Panginoon, hindi ako karapat-dapat na magpatuloy sa iyo ngunit sa isang salita mo lamang ay gagaling na ako.

Antipona ng Pakikinabang

Si Kristo'y inialay na pamaskong maamong tupa. Magsalo tayong masya sa tinapay na pamista, bago't wagas. Aleluya!

Panalangin Pagkapakinabang

P— Ama naming mapagmahal, padaluyin mo sa amin ang batis ng Espiritu ng iyong pag-ibig, upang kaming pinapagsalo mo sa piging ng Pasko ng Pagkabuhay ni Kristo ay magkaisa sa pananalig sa iyo, sa pamamagitan niya kasama ng Espiritu Santo magpasawalang hanggan.

B—Amen!

PAGWAWAKAS



P— Sumainyo ang Panginoon.

B—At sumaiyo rin!

P— Pagpalain kayo ng makapangyarihang Diyos: Ama at Anak at Espiritu Santo.

B—Amen!

P— Taglayin ninyo sa inyong pag-alis ang kapayapaan ni Kristo. Aleluya! Aleluya!

**B—Salamat sa Diyos!
Aleluya! Aleluya!**

Munting Katesismong Pampaskuwa sa Taon ng mga Kabataan

(P. René T. Lagaya, SDB)

ANG PANGUNAHING KATOTOHANAN NG PANANAMPALATAYANG KRISTIYANO

Panimula: Ang punongkahoy ay maraming bahagi. May ugat, katawan, sanga, dahon, bulaklak, at bunga. Hindi pare-pareho ang kahalagahan ng lahat ng ito. May mga bahaging kapag pinutol ay mabubuhay pa nang maayos ang puno. May iba namang kapag pinutol ay mamamatay ang puno. Halimbawa, kapag nalaglag ang ilang dahon ay mabubuhay pa nang maayos ang puno. Ngunti kapag pinutol mo ang ugat nito ay tiyak na mamamatay ang puno.

Pagpapalalim: Ang ating pananampalatayang Kristiyano ay maihalintulad din sa punongkahoy. Ang pananampalataya natin sa Muling Pagkabuhay ni Kristo ay siyang ugat ng lahat ng ating sinasampalatayanan. Ang katotohanang ito ang nagbibigay buhay at sigla sa ating pagiging Kristiyano.

Pagbasa: 1 Corinto 15:3-8

“Sapagkat ibinigay ko sa inyo itong pinakamahalagang aral na tinanggap ko rin: si Kristo’y NAMATAY dahil sa ating mga kasalanan, bilang katuparan ng nasasaad sa Kasulatan; INILIBING siya at MULING NABUHAY sa ikatlong araw, ayon din sa Kasulatan; at siya’y napakita kay Pedro, saka sa Labindalawa. Pagkatapos, napakita siya sa mahigit na 500 kapatid na nagkakati-pon. Marami sa kanila’y buhay pa hanggang ngayon, bagamat patay na ang ilan. At napakita rin siya kay Santiago, saka sa mga Apostol na sama-sama noon. Sa kahuli-huliha’y napakita rin siya sa akin – bagamat ako’y tulad ng batang ipinanganak nang di-kapanahunan.”

Buod: Sa ating sipi ay mababasa ang pananampalataya ng mga unang Kristiyano. Ito ay itinuro rin kay Pablo at kanya namang isinama sa kanyang liham. Ang lahat ng naganap kay Kristo

ay nasasaad sa Kasulatan. Siya ay namatay (*Biyernes Santo*), inilibing (*Sabado Santo*), at muling nabuhay (*Linggo ng Pagkabuhay*). Kaya nga, sa turo ni San Agustin, ito ang tatlong pinakamahalagang araw sa buong taon. Siya ay muling nabuhay sa ikatlong araw dahil hindi siya dapat madapuan ng pagkaagnas. Sa paniniwala ng mga Hudyo ay nagsisimulang maagnas ang bangkay sa ikaapat na araw.

Walang nakakita kay Hesus na buman-
ngon mula sa libingan. Subalit marami ang nakakita sa kaniya pagkatapos: si Pedro, ang Labindalawa, si Santi-
agong pinuno ng mga Kristiyano sa Jerusalem, si Pablo, at ang 500 kapatid sa pananampalataya. Dahil marami sa mga ito’y buhay pa ay maaari silang tanungin. Silang lahat ay nagkakaisa sa pagpapatotoong buhay si Kristo.

Si Kristo ay binuhay ng Ama upang ipakitang natuwa siya sa pag-aalay ng buhay ng kanyang Anak. Binuhay si Kristo at “siya ang ginawa ng Diyos na Panginoon (*Kyrios*) at Kristo (*Christos*)!” (*Gawa 2:36b*) Pinarangalan ng Ama ang Kanyang Anak at ipinagkaloob ang kanyang hiling na bigyan ng kaligtasan ang sangkatauhan. Tinanggap ng Diyos na makipagkasundo sa sangkatauhang sumuway sa Kaniya nang Kanyang muling buhayin si Kristo.

Ang muling pagkabuhay ni Kristo ang nagliligtas sa atin at siyang nagbibigay-kabuluhan sa ating pananampalataya. “At kung si Kristo’y hindi muling binuhay, walang kabuluhan ang aming pangangaral at walang katuturan ang inyong pananampalataya” (1 Corinto 15:14). Ang kanyang muling pagkabuhay ang sanhi ng ating kaligtasan. “At kung hindi muling binuhay si Kristo, kayo’y hindi pa nahahango sa inyong mga kasalanan” (1 Corinto 15:17a). Ang kanyang muling pagkabuhay ang

nagbibigay sa atin ng pag-asang tayo rin ay magtatamasa nito sa wakas ng panahon. “Kung ang pag-asa natin kay Kristo ay para sa buhay na ito lamang, tayo na ang pinakakawawa sa lahat ng tao” (1 Corinto 15:19).

Pagsasabuhay: Kay rami sa ating mga kabataan ang nababalot ng lungkot at kawalan ng pag-asa sa buhay. May ilan ngang nagpatiwakal na dahil sa matinding kalungkutan. Ang muling pagkabuhay ni Kristo ang dapat nilang panghawakan upang lumigaya sila sa buhay. Ito ang tatalo sa lahat ng kaaway, pati na sa kamatayan. Walang hindi kayang ayusin ang muling pagkabuhay ni Kristo. Walang sugat na hindi nito kayang pagalingin. Walang luha na hindi nito kayang tuyuin. Walang nakasimangot na hindi nito kayang pangitiin. Ang taong nakatuon ang pansin sa muling pagkabuhay ng Panginoon ay nabubuhay sa pag-asang tunay na nagpapalakas ng loob. Ang buhay ay hindi natatapos sa kalbaryo, kundi sa libingang walang laman. Ang buhay ay hindi natatapos sa kamatayan sa krus, kundi sa muling pagkabuhay at ligayang walang hanggan.

Pagdiriwang: “Ama naming maka-pangyarihan, ngayo’y binuksan Mo para sa amin ang pinto ng kalangitan sa pananaig ng Iyong Anak sa kamatayan. Ipagkaloob Mong sa pagdiriwang namin sa Pasko ng Pagkabuhay kami’y mabuhay sa pagpapanibagong dulot ng Iyong Espiritu sa kaliwanagan ng buhay Mo sa pamamagitan ni Hesuskristo kasama ng Espiritu Santo magpasawalang hanggan. Amen!”



**Nawa’y
pasaganain tayo ni
Kristong Nabuhay
sa kanyang
pananahan
at kapayapaan!**



**WORD & LIFE
PUBLICATIONS**

Don Bosco Compound, A. Arnaiz Ave. cor. Chino Roces Ave., Makati, Metro Manila

Postal Address: P.O. Box 1820, MCPO, 1258 Makati, Metro Manila, Philippines

Tel. Nos. 8894-5401; 8894-5402; 8892-2169 • Telefax: 8894-5241 • Website: www.wordandlife.org

• E-mail: marketing@wordandlife.org; wordandlifepublications@gmail.com • FB: Word & Life Publications

• Editorial Team: Fr. S. Putzu, Fr. R. Lagaya, C. Valmonte, V. David, J. Domingo, A. Adsuara, D. Dagui

• Illustrations: A. Sarmiento, B. Cleofe • Marketing: Fr. B. Nolasco • Circulation: R. Saldua